

## Morning Dogri (NSD) National News Bulletin 20-07-2024

आकाशवाणी

खबरां नाट्यपाल सिंह कोला।

1. भारत दा माली ते अदायगी आला सरिस्ता माइक्रोसाफ्ट दी सेवा च बिघ्न पौने दे बावजूद मुख्त तौरा पर मता प्रभावत नेई होआ।
2. भारत नै भूटान दे कन्नै अपने नेड़मे सरबंधें गी इक बारी फही पक्का कीता ऐ ते दपक्खी सरबंधें गी होर तगड़ा करने दा वादा कीता ऐ।
3. बंगलादेश च हिंसा फैलने मगरा सरकार नै फौज तैनात करी दित्ती ऐ ते कर्फ्यू लागू करी दित्ती ऐ।
4. महिला एशिया कप टी-20 क्रिकेट प्रतियोगिता च भारत नै कल पाकिस्तान गी 7एं विकेटें कन्नै हराई दित्ता।
5. टेनिस च स्पेन दे राफेल नडाल स्वीडिश ओपन दे सैमीफाइनल च पुज्जी गे न।

<><><><><><>

### **I.T.Outage India**

माइक्रोसाफ्ट साफ्टवेयर च कल होई दी बड़दे स्तर दी गड़बड़ी दे बावजूद बी भारतीय लैन देन आले सरिस्ते पर आम तौरा पर कोई मता असर दिक्खने गी नेई लब्भा। भारतीय रिजर्व बैंक आस्सेआ जारी इक ब्यान मूजब माइक्रोसाफ्ट साफ्टवेयर च आई दी गड़बड़ी कारण भारत दे शड़े 10 बैंक दे लैन देन आले सरिस्ते च ममूली गड़बड़ी दिक्खने गी लब्बी जिसलै जे बाकी सारे सरिस्ते राएं लैन देन सामान्य आला लेखा जारी रेआ। आरबीआई नै आखेआ जे भारत दे ज्यादातर बैंकें दा आई.टी.आधारित सरिस्ता क्लाउड पर निर्भर नेई ऐ ते शड़े किश गै बैंक इस क्लाउड स्ट्राइक टूल दा इस्तेमाल करदे न। अदायगिएं सरबंधी भारत दे राष्ट्रीय निगम एनपीसीआई दे मुख्त कार्रकारी अधिकारी दिलीप आसबे होरें आखेआ ऐ जे यूपीआई समेत मुख्त दा लैन देन आला सारा आई.टी आधारित ढांचा, इस वैश्विक गड़बड़ी कोला प्रभावत नेई होआ। उआं आरबीआई नै सरबंधत सब्बने बैंकें संस्थानें ते होरने घड़ें गी

भविष्य च ऐसी कुसै गड़बड़ी जां चुनौती दी मार हेठ औने कोला बचे रौहने लेई मता सौहगा ते तैआर रौहने दी सलाह दित्ती ऐ।

<><><><><><>

## India Bhutan

भारत ने भूटान दे कन्नै अपनी डूहगी दोस्ती ते नेड़मे सरबंधे गी इक बारी फही सांझा कीता ऐ ते आखेआ जे भारत/भूटान दी सरकार ते लोकें दे हितें दे मताबक दपक्खी सरबंधें गी होर तगड़ा करने लेई वचनबद्ध ऐ। एह गल्ल भारत दे विदेश सचिव विक्रम मिश्री होरें भूटान दे प्रधानमंत्री शेयरिंग तोपके होरें गी कल थिम्पु च आक्खी। श्री मिश्री होरें भूटान दे विदेशमंत्री डी.एन.दुंग्येल हुंदे कन्नै बी मलाटी कीती ते सब्बे क्षेत्रें च आपसी हितें आस्तै दपक्खी सरबंधें गी होर तगड़ा करने बारे चर्चा कीती। विदेश सचिव होरें दऊं दिनें दे अधिकारिक दौरे लेई कल भूटान पुज्जे हे।

<><><><><><>

## Amit Shah

केन्द्री गृहमंत्री अमित शाह होर देसै दी सुरक्षा गी ठेह पजाने आले खतरे गी दूर करने लेई आतंकवादी नेटवर्क ते उंदे समर्थन आली प्रणाली गी भंग करने लेई सुरक्षा ते कनून नाफज करने आली अजेंसिएं बश्कार मते तालमेल उप्पर जोर भरेआ। कल नमीं दिल्ली च सुरक्षा ते कनून नाफज करने आली अजेंसिएं दे बक्ख-बक्ख प्रधानें कन्नै इक उच्च स्तरीय बैठक दी अध्यक्षता करदे होई गृहमंत्री होरें देसै च सुरक्षा चुनौतिएं कन्नै निबड़ने लेई आईबी दे मल्टी अजेंसी सेंटर दे कम्मकाज दी समीक्षा कीती तेआखे जे नमीं उभरदी सुरक्षा चुनौतिएं लेई सुरक्षा अजेंसिएं गी म्हेशां इक गैह अगगे रौहना चाहिदा।

<><><><><><>

## Weather

मौसम विभाग नै गुजरात, कोंकण, गोवा, कर्नाटक दे समुंद्री इलाकें, च बड़ी मती बरखा बरने दी पेशगोइ कीती ऐ। साढ़े संवाददाता नै जानकारी दित्ती ऐ जे मैहकमे आस्सेआ जारी चेतावनी मूजब केरल दे केई सारे हिस्सें, तेलंगाना, आंध्रप्रदेश दे समुंद्री कंडे कन्ने लगदे

इलाके, ओडिशा, विदर्भ, छत्तीसगढ़ ते मध्य प्रदेश च बी भारी बरखा दे असार बने दे न जिसलै जे झारखंड ते पच्छिम बंगाल दे गंगा तट आले इलाकें च अज्ज ते हिमाचल प्रदेश, उत्तराखंड, उत्तर प्रदेश, हरियाणा, पूर्वी राजस्थान दे पूर्वी कर्नाटकदे अंदरे इलाके च औंदे 4 दिनें च बरखा आली स्थिति बनी दी रौहग। मोसम विभाग ने इंदे इलावा औंदे त्रुं—चरुं दिनें दरान नागालैंड, मणिपुर, मीजोरम, त्रिपुरा, अरुणाचल प्रदेश, असम ते मेघालय च बी बरखा दे आसार दस्से दे न।

<><><><><><>

## Bangladesh

बंगलादेश च फैली दी हिंसा उप्पर काबू पाने च पुलस दे नाकाम रौहने मगरा सरकार नै फौज गी तैनात करी दित्ता ऐ ते कर्फ्यू लागू कीते जाने दी घोषणा करी दितती ऐ। सरकार आस्सेआ नौकरिएं च कोटा लाए जाने दे सरिस्ते च सुधार सरबन्धी छात्रेंद ी मंग गी लेइयै मुख्य भरै च विरोध प्रदर्शन होन लगी पे ते हिंसा भड़की पेई। प्रदर्शन दरान विद्यार्थिएं ते पुलस बश्कार टाकरें च अजें तोड़ी 105 जनें दी मौत होइ गेई ऐ। 15 बरें दे कार्यकाल च शेख हसीना सरकार लेई एह सारे शा मता चुनौती आला समे ऐ। पत्रकारें कन्ने गल्लबाट करदे होई शेख हसीना हुंदे प्रेस सचिव नयीमुल इस्लाम खान होरें आखेआ जे सरकार नै नागरिकें दी सुरक्षा लेई फौज गी तैनात करने ते कर्फ्यू लागू करने दा फैसला कीता ऐ। पुलस नै हिंसा गी फैलने थमां रोकने लेई सब्बै चाल्ली दी रैलिएं, जलूस, किट्ठे पर बंदश लाई दित्ती ऐ। हिंसें कारण बंगलादेश च केई समाचार चैनल, अखबार, मोबाइल नेटवर्क, ऑनलाइन अखबार ते सोशल मीडिया एकाउंट बंद करी दित्ते गे न।

<><><><><><>

## Amarnath Yatra

श्री अमरनाथें जी दी यात्रा पूरी चाल्ली रमानदारी ते बवस्था आले ढंगै सिर जारी ऐ ते 29 जून गी शुरू होई दी इस यात्रा दे कल 21में ध्याड़े पवित्र गुफा ते एहदे आले दुआले दे इलाकें च भारी बरखा दे बावजूद बी कल 11 जहार 231 श्रद्धालुएं पवित्र गुफा च मत्था टेकेआ। अजें कि तेज बरखा बरदे होइ यात्रा गी किश चिरै लेई रोकना बी पेआ। ताई जम्मू दे भगवती नगर स्थित यात्री निवास आले आधार शिविर थमां 28जून थमां हर रोज बिना—नागा यात्रिएं दा घाटी लेई खाना होने दा सिलसिला बरोबर जारी ऐ। अज्ज आधार

शिविर थमां 23मां जत्था 3471 यात्रुएं गी लेइयै सख्त सुरक्षा बंदोबस्तें हेठ घाटी लेई रवाना कीता गेआ जेह्दे च 2 ज्हार 620 मर्द, 720 महिलां, 3 नयाणे, 93 साधु, 34 साध्वियां ते 1 ट्रांसजेंडर शामिल ऐ। 114एं गड्डिङ्गं दे काफले च सुआर इनें यात्रिएं चा 1 ज्हार 73 लोक बालटाल ते 2 ज्हार 398 लोक पहलगाम आले रस्तेया यात्रा पूरी करगंन।

<><><><><><><><>

## India Post Rakhi

भारतीय डाक मैह्कमे नै लोकें गी सलाह दित्ती ऐ जे ओह् अपने भ्राएं ते हिखिएं प्रेमिएं गी समें सिर रक्खड़ी पजाने लेई 31 जुलाई तगर रक्खड़ी भेजी देन। मैह्कमे नै अंतर्राष्ट्रीय मेलिंग दिऐ कठनाइऐ कन्नै निबड़ने ते सीमा शुल्क सरबंध्यी समस्याएं गी खत्म करने लेई एह सलाह जारी कीती ऐ। मैह्कमे दा आखना ऐ जे रक्खड़ी आले लफाफे जां पैकेज गी सेही चाल्ली बंद कीता जा ते कन्नै पते दा पिन कोड बी पूरा ते सेही सेही लिखेआ जा। एह्दे इलावा लोकें गी अपना मोबाइल नंबर बी लिखी रखने लेई आखेआ गेआ ऐ। मैह्कमे नै इब्बी सलाह जारी कीती ऐ जे रक्खड़ी आले लफाफे जां पैकेट च कोई खराब होने आली चीज, तौले अगग फगड़ने आले जां डुल्लने आली कोई चीज नेई रखन तां जे तुंदी रक्खड़ी सेही ढंगै सिर तुंदे प्रियजने तोड़ी पुज्जी सकै।

<><><><><><><><>

## Asia cup

महिलाएं दे एशिया कप टी-20 क्रिकेट च कल संजा'लै श्रीलंका दे दाम्बुला च भारत नै पाकिस्तान गी 7एं विकटें कन्ने हराई दित्ता। 109 रंजें दा पिच्छा करदे होई भारत नै एह लक्ष्य 7 विकटें ते 35 गेदें दे होंदे पैह्ले गै पूरा करी लेआ। पैह्ले बल्लेबाजी दा फैसला करदे होई पाकिस्तान नै 19.2 ओवरें च 108 रंज बनाए हे। भारती शुरुआती बल्लेबाज शिफाली वर्मा ते स्मृति मंदाना होरें 40 ते 45 रंज बनाए। दीप्ती शर्मा होरें 20 रंज देइयै 3 विकेटां हासल कीतियां ते उनेंगी प्लेयर ऑफ द मैच चुनेआ गेआ। भारत ऐतवारें यूएई कन्नै अपना अगला मैच खेडोग।

<><><><><><><><>

## Swedish Open

स्वीडिश ओपन टेनिस प्रतियोगिता च मर्दे दे सिंगल्स यानि इक्कले इक्कले सैमीफाइनल मकाबले च अज्ज स्पेन दे राफेल नडाल दा सामना क्रोएशिया दे दूजेएज्जू कोविड कन्नै होग। एह्दे शा पैहले क्वार्टर फाइनल च नडाल नै अर्जेटीना दे मारियानो नोवान गी 6-7, 7-5, 7-5 कन्नै हराया। दुए सैमीफाइनल च अर्जेटीना दे थियागो ऑगस्टिन तिरांते दा मकाबला पुर्तगाल दे नूनो बार्गेस कन्नै होग। तोआई मर्दे दे डबल्स मकाबले च फ्रांस दे मैनुअल ग्वीनार्ड ते ग्रेग्रीयोर जैक दी जोड़ी कजाकिस्तान दे एलक्जेंडर नेदोव येसोव ते एक्वाडोर दे गोजांलो एक्सोबार दी जोड़ी गी रहाइयै फाइनल च पुज्जी गई ऐ।

<><><><><><>

## Block Diwas Rajouri

राजौरी दे जिला विकास आयुक्त ओ.पी.भगत होरें थन्नामंछी च लोकें तगर पुज्ज बनाने लेई ब्लाक दिवस प्रोग्राम तैहत शिविर च हिस्सा लैता। उनें सरकारी सेवाएं च पारदर्शी, जवाबदेही ते लोकें दे घरें दे कोलकाल सेवा उपलब्ध करोआने लेई प्रशासन दी वचनबद्धता जाहर कीती। शिविर दरान लोकें ते उंदे नुमायंदे आस्सेआ बक्ख-बक्ख मामलें गी पुट्टेआ गेआ। डिप्टी कमीशनर होरें लोकें दे मसलें गी ध्यानै नै सुनेआ ते लोकें गी भरोसा दोआया जे उंदे जायज मसलें दा समें बद्ध ढंगै सिर पक्क गै हल कीता जाग। श्री भगत होरें लोकें गी बक्ख-बक्ख सरकारी स्कीमें ते प्रोग्रामें बारे दस्सने ते उनेंगी अग्गे आइयै इनें स्कीमें थमां लाह् ठोआने लेई गलाया।

<><><><><><>

## Gold Smuggling

भारत तिब्बत बार्डर पुलस आईटीबीपी नै पूर्वी लद्दाख च सिरीगैपल इलाके थमां सुन्ने दे किलो-किलो दे 108 इट्टां बरामद कीतियां न। आईटीबीपी नै अपने इक सोशल मीडिया पोस्ट राएं जानकारी दित्ती ऐ जे बल दी 21मीं बटालियन दे डिप्टी मकांडेंट दीपक भट्ट हुंदी अगुवाई च गश्त करा'रदी टीम नै इस सिलसिले च दऊं संदिग्धें गी फगड़ेआ ऐ ते पुच्छ-गिच्छ जारी ऐ।

<><><><><><>